

SAN PABLO ITLATITLANIL IN DIOS

OKINTLAJKUILILIJ IN TLANELTOKAKEJ DE COLOSAS

**Pablo okintlajkuililij in tiopantlaneltokakej
katlej katej itech weyikan de Colosas**

1 Nej niPablo, nitlatitlanile de Jesucristo porke Dios ijkón okimonekiltij. Nej iwan tokni Timoteo, ²namechikuilia yin amatlajkuilole namejwan antokniwan katlej anchantij itech weyikan de Colosas, namejwan katlej ankatej anchipawakej inawak Dios iwan amo ankawaj de antlaneltokaj inawak Cristo. ToPapan Dios ma kipia weyi iteiknotlamachilis amonawak iwan ma amechmaka yolosewilistle.

Pablo omotiotzajtzili por yen tlaneltokakej

³Nochipa timotlasojkamatij inawak Dios, iPapan toSeñor Jesucristo, níkuak timotiotzajtziliaj por amejwan. ⁴Porke yotikmatkej nik kuale antlaneltokatokej inawak Cristo Jesús, iwan nik kuale ankintlasojojtaj nochtin katlej iaxkawan Dios. ⁵Porke namejwan ankichixtokej nekáj tonale níkuak Dios amechmakas ompa ilwikak tlan Yej kipixtok para amejwan. Namejwan ya ankimatij tlan axan ankichiaj porke ya ankikakej in melawak kuale tlajtote katlej temakixtia. ⁶Yon kuale tlajtote katlej temakixtia katlej amejwan ankikakej, motematiltijtok itech nochí in tlaltikpak, iwan kinyolpatlatok miekej tlakaj ijkón ken namejwan oamechyolpatlak desde ikuak ankikakej iwan ankimomakakej kuenta katlej melawak iteiknotlamachilis in Dios. ⁷Yen yon tlan oamechmachtij in totetlasojkaikni Epafras, katlej kitekipanoa in Dios ken nej, katlej tikmatij nik kuale kitekipanoa in Cristo iwan katlej tekipanojtok por amejwan. ⁸Yej otechilwíj nik in Espíritu Santo oamechmakak miek itlasojojtalis para ximotlasojojtakan se iwan oksé.

⁹Por yonik tejwan desde nekáj tonale níkuak otikmatkej nik kuale antlaneltokatokej iwan anmotlasojojtaj, tejwan mach tikkawaj de timotiotzajtziliaj por amejwan. Tiktlatjlaniliaj in Dios ma amechpalewi para xikmatikan nochí tlan Yej kineki iwan ma amechmaka ixtlamachilistle iwan tlalnamikilistle katlej kitemaka in Espíritu

COLOSENSES 1

Santo. ¹⁰Ijkón namejwan welis ankipaktiskej in Señor ika namonemilis ijkón ken moneki yeskej nochtin katlej iaxkawan Señor. Iwan welis ankichiwaskej nochí tlamatle tlan kuale, iwan kada tonale okachi kuale ankiyekixmatiskej in Dios. ¹¹Dios kipia weyi ipoder iwan yon poder kipia weyikixtilistle, iwan tiktlajtlaniliaj ma amechmaka chikawalistle ika yon ipoder para ijkón welis ankixikoskej nochí tlajyowilistle tlan anpanoskej iwan asta ankipiaskej pakilistle. ¹²Iwan xiktlasojkamachilikan in toPapan Dios, porke okichij ma tiwelikan ma tikresibirokan tlan techtokaroa inwan nochtin katlej iaxkawan in Dios, katlej katej ijistik tlanextle kan Yej tlanawatia. ¹³Dios otechmakixtij de itech ipoder in tlatleyualotl kan tlanawatia in Amo Kuale Tlakatl, iwan otechtlalij kan tlanawatia iKone Jesús katlej toTajzin Dios kitlasojtla. ¹⁴Iwan yen Jesús katlej otechkoj ika ieso para otechmakixtij de itech ipoder in Amo Kuale Tlakatl, iwan otechtlapojpolwij de nochí totlajtlakol.

Yotimotlapojpolwijkej iwan Dios ika Cristo imikilis

¹⁵Mach akaj tlakatl weli kita in Dios iwan nion mach akaj kixmati, pero Yej omoteititij por medio de Cristo, iKone in toTajzin Dios, katlej yoyeka desde ikuak Dios ayamo okichiwaya nochí tlan onkaj. ¹⁶Cristo Yej okichij nochí tlan onkaj itech ilwikak iwan ixko yin tlaltikpak, katlej weli tikitaj iwan katlej mach weli tikitaj. Noijki okintlalij in reytin, gobernadortin, iwan katlej kipiaj tekiwajkayotl iwan poder itech ilwikak. Nochi okichij in Cristo iwan nochí iaxka para ma kichiwakan tlan Yej kineki. ¹⁷Cristo yoyeka desde ikuak ayamo oyeka nochí tlamatle, iwan ika ipoder nochí tlamatle kiseguiroa kuale yawi asta axan. ¹⁸Tejwan tikmatij ke totzontekon yen kiyekana in totlalnakayo. Cristo noijki kajki kej totzontekon katlej techyekana tejwan titlaneltokakej iwan tikatej kej itlalnakayo. Iwan yen tlayekanke de tiopan, kijtosneki nochtin katlej kineltokaj. Itech Cristo opéj nochí in tlamatle, yen achtoj omoyolkuik satepan de omikke, para yen okachi weyikistos (weyititos) de nochí tlamatle. ¹⁹Porke in toPapan Dios okimonekiltij ke iKone Jesucristo ma yeto ken Yej, iwan ma kipia nochí ipoder ken Yej kipia. ²⁰Dios okimonekiltij noijki ke nochtin katlej katej ixko yin tlaltikpak iwan katlej katej itech ilwikak, ma motlapojpolwikan iwan Dios para ayakmo ma yekan kej ikontraswan. Dios otechtlapojpolwij nikuak Cristo omikke iwan onokiwik ieso itech krus.

²¹Namejwan achtoj mach ankixmatiaj in Dios, anyekaj ankontrastin de Dios porke ankichiwayaj tlan amo kuale. ²²Pero axan Dios yoamechtlapojpolwij por medio de imikilis in Cristo nikuak otlajyowij itech itlalnakayo. Ijkón okichij para welis amechteixpantis inawak Dios

ya anyolchipawakej. Mach ok ankipiaskej nion itlaj tlajtlakole iwan nion mach ok akaj welis amechistlakawis de itlaj inawak Dios. ²³Moneki kiné, ma titlaneltokakan ika noch toyolo iwan ma timoyekketokan itech totlaneltokalis. Amo semi tikkawaskej in kuale tlajtole katlej temakixtia katlej tikkaktoej iwan katlej techilwia noch tlan kuale tlan techchia ompa ilwikak. Yin kuale tlajtole katlej temakixtia motematiltijtok itech noch in tlaltikpak, iwan nej niPablo noijki niktematiltia in yin kuale tlajtole.

Dios okitlalij in Pablo para ma kinpalewi in tlaneltokakej

²⁴Axan sa tekitl nipaki por yen tlajyowilistle katlej nipanotok por amejwan. Nipanotok tlajyowilistle itech notlalnakayo para nitlapalewis ma moajxiti de tlan polawi tlajyowis in Cristo itech itlalnakayo, itlalnakayo kijtosneki yejwan tlaneltokakej. ²⁵Dios onechtlalij ma nieto niitekipanoj para namechpalewis namejwan, iwan para namechmatiltis nochitlajtol in Dios, ²⁶kijtosneki, yen tlan achtoj in tlakaj mach okimatiaj porke in Dios ayamo okinnextiliya desde ikuak opéj in tlaltikpak. Pero axan Dios yokinnextilij nochtin katlej iaxkawan. ²⁷Dios okinekke ma kimatikan katlej iaxkawan katlej achtoj mach akaj okimatis, de yen sa tekitl kuale tlamantle iwan kuakualtzin katlej kinchiwilis katlej amo judiojtin. Iwan yen yin katlej kineki nochtin ma kimatikan: ke nikuak kipiaskej in Cristo ipan inyolo, kuale ma kimatikan nik kipiaskej parte itech imawisotlanex kan yetos in Cristo.

²⁸Por yonik, san kan tiawij, tejwan titetlapowiaj de Cristo. Tikinnajnawatiaj iwan tikinmachtiaj ika noch ixtlamachilistle katlej Dios techmaka, para ijkón welis tikinteixpantiskej nochtin in tlakaj inawak Dios ya chijchikawakej itech intlaneltokalis iwan ya setitokej san se iwan Cristo Jesús. ²⁹Por yonik nej noijki nitekipanoa chikawak ika noch chikawalistle katlej Cristo nechmaka ika ipoder.

2 Nikneki xikmatikan nik in nej sa tekitl nimotekipachoa nimotiotzajtzilia inawak Dios por amejwan, iwan por nochtin in tlaneltokakej katlej katej itech weyikan Laodicea, iwan noijki por nochtin oksekimej tlaneltokakej katlej mach nechixmatij. ²Nimotekipachoa nimotiotzajtzilia inawak Dios porke nikneki ximoyolojchikawakan, iwan ximosetilikan ika tlasojtlalistle, para ijkón okachi xikweyilikan namotlalnamikilis, iwan xikmatikan tlan ya wejkawitl in Dios mach okinnextiliya in tlakaj, kijtosneki yen Cristo. ³Porke itech Cristo kajki noch in rikojoytl de yen tlalnamikilistle iwan ixtlamachilistle. ⁴Ijkón namechilwia namejwan para amakaj ma amechkajkayawa ika itlaj tlajtole kuakualtzin. ⁵Maski nej mach nikaj ompa amoyakapan, nej ompa nikaj

COLOSENSES 2

amowan ika noespíritu, iwan nipaki porke nikmati nik kuale anmowikaj iwan ammoyekketokej itech namotlaneltokalis inawak Cristo.

⁶Por yonik, como namejwan ya ankineltokakej in toSeñor Jesucristo, axan xinemikan iwan Yej, ijkón ken Yej kineki. ⁷Ximonelwayotikan itech Yej ken se kuawitl monelwayotia ijtil tlale. Iwan ximokitzkijtovan itech Yej ken se tepamitl tlakitzkijtov ipan cimiento. Iwan ximochikawan okachi itech namotlaneltokalis ijkón ken oamechmachtijkej. Iwan nochipa xikmakatokan tlasojkamachilistle in toTajzin Dios.

Yankuik nemilistle katlej onkaj itech Cristo

⁸Namejwan xikpiakan kuidado para amakaj ma amechkajkayawa ika tlamachtile iwan tlayejyekolistle katlej mach itlaj inpatij iwan mach melawak. Porke yon tlamachtile kikixtiaj de itech intlayejyekolis iwan de itech inkostumbre in tlaltikpaktlakaj katlej tlanawatiaj ixko yin tlaltikpak, iwan mach de itech itlamachtil in Cristo.

⁹Porke Cristo kipia nochia tlan Dios kipia, maski okipixke itlalnakayo ken tejwan nijuak owitza ixko yin tlaltikpak. ¹⁰Iwan namejwan mach itlaj amechpoloa tla ankatej inawak Cristo, iwan tla se setitos iwan Yej, noijki se tentos de Dios. Iwan Cristo kipia poder itech nochtin tekiwajkamej iwan itech nochtin katlej kipia poder. ¹¹Iwan namejwan por ansetitokej san se iwan Cristo, kijtosneki namejwan ankiresibirojkej in sirkunsisión. Pero amo yen sirkunsisión ken katlej kichiwaj in judiojtin itech intlalnakayo, sino yin sirkunsisión yen katlej Cristo okichij ipan toyolo. Katlej katej sirkunsidadojtin ipan inyolo mach ok kichiwaj tlan amo kuale tlan kineki kichiwas intlalnakayo. ¹²Nijuak amejwan anmokuateekijkej, kijtosneki oamechtookakej iwan Cristo, iwan noijki ammoyolkuikej iwan Yej. Porke namejwan ankineltokakej in Dios katlej kipia poder katlej okiyolitij in Cristo. ¹³Achtoj namejwan Dios amechitaya kej yeskia anmikkamej por yen namotlajtlakol iwan por yen tlan amo kuale katlej nochipa ankinekiaj ankichiwaskej ika namotlalnakayo. Pero axan Dios yoamechylitij iwan Cristo iwan yoamechtlapojpolwij de nochia namotlajtlakol. ¹⁴Tejwan otiktewikiliyaj se kuenta, iwan mach otiwelaj otiktlaxtlawayaj. Pero Dios yokipojpolo yon kuenta. Kej yeskia okiklabostookak itech krus ijkón ken Cristo okiklabostookakej itech krus. Axan, yon kuenta mach ok keman techtzakuilis porke mach ok tikpiaj. ¹⁵Dios otlatlanke de itech ipoder in Amo Kuale Tlakatl iwan de itech ipoder in ejekamej mach kualtin. Iwan okinpinatij inmixpan nochtin porke mach otlatlankej, porke Cristo okintlanke nijuak omikke itech krus.

Xiktemokan tlamantle de ilwikak

¹⁶Por yonik, amo xikchiwakan kuenta tla akaj amechilwis mach kuale tlan ankikuaj o noso tlan ankonij. Iwan nojki amo xikchiwakan kuenta tla akaj amechixnamikis por amo ankichiwaj ilwitl de yen judiojtin, ken nikuak onkaj selik metztle, o noso nikuak mosewiaj in judiojtin itech sábado. ¹⁷Nochi yon tlamantle okipiaya ipatij nikuak ayamo ovalaya in Cristo, pero axan mach ok itlaj ipatij. Achtoj otiekaj kej yeskia otiekaj itech se ekawitl, pero axan ya tikatej itech Cristo de kan ovalajtoka in yon ekawitl. ¹⁸Amo ximotekawilikan ma amechkixtilikan namotlatliokolil nekatej katlej mochiwaj wel pasensiatzitzintin, kinweyikixtiaj angelestин, nochipa kijtaj kitaj itlaj tlamantle kej yeskia kiteemikij iwan kinekij nochtin ijkón ma kichiwakan. Amo xikinneltokilikan iwan nion amo xikinkawilikan yejwan ma amechilwikan tlanon moneki ankichiwaskej. Yejwan moweyinekij itech se tlamantle katlej mach keman kitaj, iwan kichiwaj san tlan yejwan kiyeyekoaj ipan intlalnamikilis. ¹⁹Pero yejwan mach mokitzkijtokej iwan Cristo, katlej yen kajki kej itzontekon itlalnakayo. Pero tejwan tikatej ken itlalnakayo iwan timokitzkijtokej iwan Yej, ijkón ken totlalnakayo nochi mokikitzkijtok. Iwan yen Cristo katlej techmaka chikawalistle para timoskaltiaj ijkón ken Dios kineki.

²⁰Namejwan kuale xikmatikan nik ya anmikkej nikuak Cristo omikke, iwan ya anmakiskej de itech intlamachtil iwan de itech inkostumbre in tlaltikpaktlakaj. ¿Tlanik kiné ok ankichiwaj ken nekatej tlakaj katlej mach kixmatij Dios? ¿Tlanik ankichiwaj tlan kijta intlanawatil, ²¹katlej kijta: “amo xikitzki yin tlamantle, amo xikua yon tlamantle, amo xikmatoka nekáj tlamantle”? ²²Nochi yon tlanawatile iwan tlamachtile kisa san de itech intlayejyekolis in tlakaj, porke in tlakuale omochij para se kikuas, iwan nikuak se kikua ompa tlami. ²³Yonmej tlanawatiltin motaj kej yeskia melawak kualtin, porke akinmej kichiwaj yonmej tlanawatiltin, sa tektil motemaktiaj itech iwan kitlajyowiltiaj intlalnakayo para mochikawaskej itech intlaneltokalis. Pero nochi yon mach itlaj kinpalewia para ayakmo ma kinyoltilana tlan kineki intlalnakayo.

3 Ijkón kiné, tla namejwan Dios yoamechyolitij iwan Cristo, xiktemokan ika nochí amoyolo tlan onkaj itech ilwikak kan Cristo ewatok ik iyekma in toTajtzin Dios. ²Xiktlalikan namoyolo itech tlan onkaj ilwikak, amo xiktlalikan namoyolo itech tlan onkaj ixko yin tlaltikpak. ³Para yen tlaltikpak namejwan ya ankatej kej yeskia anmikkamej, iwan axan in yankuik namonemilis kajki tlatitok inawak Cristo kan kajki in toTajtzin Dios. ⁴Itech nekáj tonale nikuak monextis in Cristo katlej otechyolitij

ika inemilis, ikuakón nojki namejwan ammonextiskej iwan Yej itech imawisotlanex.

Katlej achtoj tonemilis iwan katlej yankuik tonemilis

⁵Por yonik kiné, xikelkawan nochí tlamantle tlan amo kuale tlan onkaj itech namonemilis. Amakaj ma momekati, amakaj ma kichijtinemi tlan amo chipawak, amo xikchiwakan biero tlan kineki namotlalnakayo, amo xikkawilikan in elewilistle ma amechyoltilana, amo xiknekikan ankipiaskej okachi de tlan ya ankipiaj. Nochtin katlej kichiwaj yon tlamantle, kikuepaj yen yon indios porke yen yon tlan okachi kichiwaj.

⁶In tlakaj katlej kichiwaj in yonmej tlamantin bierotikej, mach kineltokaj itlajtol in Dios, iwan por yonik in Dios kintlajyowiltis chikawak ika ikualanilis. ⁷Achtoj namejwan nojki ankinchiwayaj nochí yon tlamantle nikuak anyekaj ken nekatej tlakaj katlej ijkón kichiwaj. ⁸Pero axan namejwan mach ok ijkón xikchiwakan. Amo xikualanikan, amo xitekokolikan, amo xitetoktikan tlan amo kuale, amo xitlawikaltikan, iwan nion amo xikiitokan itlaj tlajtole biero. ⁹Ayakmo xikmolwikan entre amejwan itlaj tlan amo melawak. Porke ya ankipajkej namonemilis katlej achtoj ankipiayaj katlej oamechtoktiaya xikchiwakan tlan amo kuale.

¹⁰Pero axan Dios yoamechyankuili j ika se nemistle yankuik, katlej ika anmochijtiaskej okachi ken Yej. Ika yin yankuik nemistle namejwan okachi welis kuale ankixmatiskej in Dios katlej otechchij. ¹¹Dios mach ok techita kox tijudiojtin o noso amo tijudiojtin, kox tisirkunsidadojtin o noso amo tisirkunsidadojtin. Nojki in Dios mach kita kox se witz de oksekan, o noso kox se amaixmaj, kox se tlanamakte o noso amo. Sino moneki ma se kineltoka in Cristo, porke Cristo yen kinyekana nochtin katlej kipiaj yankuik nemistle iwan kajki itech nochtin katlej kineltokaj.

¹²Dios amechtlasojtla iwan oamechpejpenke para xiekan ikonewan. Por yonik, ika yin yankuik amonemilis namejwan xiteiknomatikan. Xiktechiwilikan tlan kuale iwan amo ximoweyinekikan. Amo niman xikualanikan iwan xikxikokan tlan anpanoaj. ¹³Tla akaj itlaj oamechtoktij, xikxikokan iwan xiktlapojojpolwikan, ijkón ken namejwan oamechtlapojojpolwij in Cristo, namejwan no ijkón xikchiwakan. ¹⁴Iwan katlej okachi moneki, yen xikmatikan ximotlasojtlakan se iwan oksé, porke in tlajtlatlistle yen kichiwa melajka kuale xisetitokan aminochtin. ¹⁵Iwan xikkawilikan in yolosewilistle katlej Cristo amechmaka ma amechyekana ipan namoyolo, porke por yonik in Dios oamechnotzke para ximochiwakan sa se tlalnakatl. Iwan xikmatikan ximotlasojkamatikan.

¹⁶Xikkawilikan itlamachtil in Cristo ma tento ipan namoyolo. Ximomachtikan iwan ximonajnawatikan se iwan oksé ika tlalnamikilistle

katlej Dios kitemaka. Xitlakuikakan ika tlasojkamachilistle ipan namoyolo. Xikintlakuikakan salmos, tlakuikaltin de weyikixtilistle iwan tlakuikaltin katlej amechmaka in Espíritu Santo para ankiweyikixtiskej in toTajzin Dios. ¹⁷Iwan nochí tlan ankichiwaskej o noso tlan ankijtoskej, xikchiwakan ijkón ken kipaktia in toSeñor Jesús. Iwan xiktlasojkamachilikan in toPapan Dios por medio de yen toSeñor Jesús.

Kenik moneki yeskej in tlaneltokakej

¹⁸Siwamej, namejwan katlej antlanamiktiltin, moneki ximotekawilikan ma amechyekanakan namookichwan ijkón ken moneki ankichiwaskej porke namejwan ankineltokaj in toSeñor. ¹⁹Okichtin, namejwan katlej antlanamiktiltin, moneki xikintlasojtlakan namosiwawan iwan amo xikinnejnekilikan (xikinmaltratarokan). ²⁰Namejwan antepilwan, xikintlakitakan namopapanwan itech nochí tlan yejwan amechnawatiaj, porke ijkón kipaktia in toSeñor. ²¹Tetajmej, amo xikinkualankanolzakan namopilwan, para amo ma moyolotlamitikan iwan amo ma kikawakan de kichiwaskej tlan kuale. ²²Tekipanojkej, xikchiwakan nochí tlan amechnawatiskej namotekowan nian ixko yin tlaltikpak. Kuale xitekipanokan amo san yej nijuak ankatej ixpan namoteko para ma amechita nik kuale antekipanoaj. Sino moneki xitekipanokan ika kuale amoyolo para ijkón ankiteititiskej nik melawak ankitlakitaj in toTajzin Dios. ²³Iwan nochí tlan ankichiwaskej, xikchiwakan ika nochí amoyolo, kej yeskia ankichiwj para yen toSeñor iwan amo para akaj oksé tlakatl. ²⁴Porke namejwan kuale ankimati j nik in toSeñor ajsis tonale Yej amechtlaxtlawis, porke amechmakas in herencia tlan amechtokaroa ompa ilwikak. Porke namejwan ankitekipanoaj in Cristo katlej toTeko. ²⁵Pero akin kichiwa tlan amo kuale kiresibiros itlaxtlawil de yen tlan amo kuale katlej okichij, porke Dios techita tinochtin san se parejo iwan mach kintlasojtla san sekimej iwan oksekimej amo.

4 Namejwan katlej antekomej, xikinchwilikan tlan kuale namotekipanojkawan. Ijkón ken tikchiwa iwan se, no ijkón xikchiwa iwan oksé. Porke namejwan noiiki kuale ankimati j nik ankipiaj se amoTeko ompa ilwikak.

²Amo semi xikkawakan de anmotiotzajtziljitoskej inawak Dios, iwan kuale xiijsatokan para ankimatiskej tlanon nankitlajtlaniliskej, iwan xiktlasojkamachilikan por nochí tlan kichiwa por amejwan. ³Noiiki ximotiotzajtzilikan por tejwan. Para Dios ma techititi kanin moneki titetlapowiskej de itlajtol. Tiknekij tikintlapowiskej in tlakaj de itlajtol in Cristo katlej ya wejkawitl mach ya akaj okikakia. Iwan por yonik axan nej onechtzakej porke niktematiltia itlajtol in Cristo. ⁴Ximotiotzajtzilikan

inawak Dios para ma nechpalewi kuale ma nitetlapowi de itlajtol in Cristo ken moneki iwan kuale ma kimomakakan kuenta nochtin katlej kikakiskej.

⁵Xikmatikan kenik annemiskej inwan katlej mach kixmatij Dios, amo xikpolojtokan tiempo, sino xikintlapowikan de itlajtol in Dios. ⁶Moneki in tlakaj ma amechwelitilikan namotlajtol nikuak antlapoaskej iwan amo ma kinkuejso. Iwan ijkón namejwan anyeskej ken istatl katlej kiwelialtia in tlakuale. Tla namejwan ijkón antlapoaskej, tonses namejwan ankimatiskej kenik moneki ankinnankiliskej nochtin.

Pablo okonintlajpaloj

⁷Tíquico, katlej totetlasojkaikni inawak Dios, yej amechilwis nochi tlan nipanotok iwan kenamij nikaj. Yej nochipa kuale kichiwa tlan Dios kineki iwan nowan kitekipanoa in toTajzin Dios. ⁸Yej niktitlani amonawak para ma amechilwi kenamij tikatej iwan para ma amechyolojchikawa. ⁹Nojki kiwika in totetlasojkaikni Onésimo katlej nojki nochipa kichiwa tlan Dios kineki iwan katlej chanti ompa Colosas. Yejwan amechilwiskej nochi tlan nian tlapanotok.

¹⁰Amechontlajpaloa in Aristarco, katlej nian iwan nitzaktok. Nojki amechontlajpaloa in Marcos, iprimo in Bernabé. Namejwan yonamechilwij kenik moneki ankiresibiroskoj in Marcos tla yej yas amechitati, moneki xikresibirokan ika kuale. ¹¹Nojki amechontlajpaloa in Jesús, katlej nojki itoka Justo. San yejwan yinmej judiojtin tlaneltokakej katlej tekipanoaj nowan itech itekiw in Dios, iwan yejwan sa tekitl nechyolojchikawaj. ¹²Nojki amechontlajpaloa in Epafras katlej itekipanoj in Cristo iwan katlej nojki de ompa Colosas. Yej nochipa motlatlawtijtok inawak Dios por amejwan para ximoyekketokan iwan ximochikawan itech namotlaneltokalis, para ijkón kuale xikmatikan tlan Dios kineki xikchiwakan. ¹³Nej kuale nikmati nik Epafras sa tekitl motekipachoa por amejwan, iwan nojki por nekatej tokniwan tlaneltokakej katlej katej itech weyikan de Laodicea iwan itech weyikan de Hierápolis. ¹⁴Lucas, in totetlasojkaikni tepajtij, amechontlajpaloa, iwan nojki amechontlajpaloa in Demas.

¹⁵Xikonintlajpalokan in tokniwan katlej katej itech weyikan de Laodicea. Xikontlajpalokan nojki in tokni siwatl Ninfas, iwan nojki xikonintlajpalokan in tokniwan katlej mololoaj ompa ichan. ¹⁶Namejwan nikuak antlamiskej ankileroskej yin amatlajkuilole, xikintitlanilikan in tokniwan katlej katej itech weyikan de Laodicea para yejwan nojki ma kilerokan. Namejwan nojki xiklerokan in amatlajkuilole katlej onikintitlanilij in tokniwan de Laodicea, katlej yejwan

COLOSENSES 4

amechwaltitlaniliskej. ¹⁷Xikilwikan in Arquipo amo ma kelkawa de ma kichiwa in tekitl katlej in toSeñor okimakak.

¹⁸Nej niPablo, namechijkuililia yin tlajpalolistle ika noma. Xikelnamikikan nik nitzaktok. Ma Dios kipia weyi iteiknotlamachilis amonawak. Ijkón ma yeto.